

Izjava: Visoki predstavnik reaguje na javne izjave predsjednika RS Čavića

U pismu poslatom predsjedniku RS Draganu Čaviću, visoki predstavnik Paddy Ashdown izražava nezadovoljstvo nedavnim javnim izjavama predsjednika Čavića koji je branio komentare ministra unutrašnjih poslova RS, Darka Matijaševića.

“S pravom navodite da je i direktor policije FBiH Zlatko Miletić davao izjave slične sadržine prije nekoliko mjeseci. Ali ste sasvim u krivu kada kažete da nije bilo reperkusija nakon toga. G. Miletiću je tada snažno skrenuta pažnja na neprimjerenost njegovih poteza, i to na isti način kao i g. Matijaševiću ovom prilikom. Ovo nema nikakve veze sa relevantnošću ovoga pitanja sa navodnim ratnim zločinima počinjenim nad Srbima, kako Vi pogrešno i provokativno tvrdite. Ovdje se radi o primjeni pravih evropskih i profesionalnih standarda. Duboko žalim zbog činjenice da ste Vi našli za shodno da tretirate ovo kao etničko pitanje kada se radi o čisto profesionalnom pitanju.”

“Boško Čeko je na sličan način davao javne komentare o mogućim krivičnim malverzacijama utvrđenim u procesu revizije. Siguran sam da znate da javni revizor djeluje unutar pravnog okvira koji mu nalaže da vrši finansijske revizije i utvrđuje i dokumentuje primjere nepravilnosti u računovodstvu. On ne igra ulogu u istrazi niti gonjenju počinilaca krivičnih djela, i njegove izjave su bile jednostavno opis rezultata revizije.”

“I Tobi Robinson je davala brojne izjave u javnosti u kojima je objašnjavala svoju ulogu privremene upraviteljice i opisivala rezultate aktivnosti koje je preduzimala u tom svojstvu. Ali, isto tako, ni ona ne igra ulogu u istrazi niti gonjenju počinilaca krivičnih djela.”

“Ministri unutrašnjih poslova imaju konkretne, zakonske i definisane dužnosti i odgovornosti koje moraju izvršavati u pogledu profesionalnog rada sa informacijama kojima policija raspolaže. Od njih se traže najviši standardi, što, sa žaljenjem moram reći, ovaj put nije bio slučaj. Sada se nalazimo u kritičnoj tački borbe da ponovo uspostavimo vladavinu zakona. Siguran sam da ćete se složiti s time da Bosna i Hercegovina nije baš u situaciji da sebi može priuštiti da se njeni lideri upuštaju u javne kampanje koje ugrožavaju uspjeh krivičnih istraga”, zaključio je visoki predstavnik.